

# Amours qui a son oés m'a pris

Linker 65,5; RS 1591

Ms.: O 3 = anonimo.

Metrica: a8 b8 a8 b8 b8 c10' c10' d10 d10 c10' (MW 1011,1). *Chanson* di 5 *coblas unissonans* di 10 versi, seguite da 2 *tornadas* di 4.

Edizioni: Petersen Dyggve 1951, p. 376.

- letto 341 volte

## Edizioni

- letto 297 volte

## Petersen Dyggve

I.

Amours qui a son oés m'a pris  
me fait envoisier et chanter  
pour vos, dame, ou j'ai mon cuer mis,  
dont je ne[l] puis ne quier oster,  
ainz vos vuil servir et amer  
de cuer loial entier, sanz tricherie,  
que d'autre amour n'ai talant ne envie,  
et Dex me doint [tant] faire et tant valoir  
que vos vuilliez de moi merci avoir,  
car en vos est ou ma mort ou ma vie.

II.

Dame, vos m'avez si conquis  
que je ne puis aillors penser  
et j'ai si læaument empris  
de vos servir et honorer  
que ja ne m'i verroiz fauser.  
Mon cuer avez tot an vostre baillie,  
s'avez sor moi pooir et seignorie,

ne ja més jor n'avrai autre voloir,  
ainz servirai de cuer en bon espoir  
vos et Amours qui s'est de moi saisie.

III.

Se de vos amer sui sopris,  
qu'en puis je, quant j'oi tant loer  
vostre grant beauté, vostre pris,  
vostre sen, vostre bel parler,  
vostre semblant, vostre acesmer,  
vostre valour et vostre cortoisie;  
vostre cors gent, que mes fins cuers n'oblie,  
me fait sovent sopirer et doloir,  
et tant vos dout et ain sanz decevoir  
que mar vos vi, se de vos n'ai aïe.

IV.

Dame, onques mon cuer ne vos dis,  
et toz jors le vos cuit celer,  
et s'ai je aucune foiz empris  
que je[<sup>l</sup>] vos cuidoie mostrer;  
més quant j'en vuil a vos parler,  
li sens me faut, la parole me lie,  
je n'ai pooir que nule rien vos die,  
si ne voi pas con le puissiez savoir,  
se vostres sens ne vos fait percevoir  
la bone amour qui est en moi norrie.

V.

Sovant sui iriez et pensis  
quant je ne puis a vos parler:  
por felons de vostre païs  
n'os venir vers vos ne aler.  
Ainsi me covient endurer  
grief mal por vos, et si nou savez mie;  
més je vuil bien que ma chansons vous die  
que bien poëz conoistre et percevoir  
a mon semblant quant je vos puis veoir  
que plus vos ain que rien qui soit en vie.

VI.

Douce dame, cui n'os nommer amie,  
des que je n'ai hardement ne pooir  
de vos mostrer mon mal et mon voloir  
en lieu de moi ceste chansons vos prie.

VII.

D'un Chastelain vuil que ma chansons die,  
Hun, qu'il pant d'amer et de valoir  
et esloignier touz cés a son pooir  
qui sont vilain et ploin de felonie.

- letto 206 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/amours-qui-son-o%C3%A9s-ma-pris>